

INUIT ATAQATIGIIT

INATSISARTUNI



Nuuk, 1. november, 2013

Inatsisartut Suleriaasianni § 37 naapertorlugu Naalakkersuisunut makkuninnga apeqquteqaateqassaanga.

- 1) **Atortussiassanut radioaktiviusunut atatillugu attueqqusinngilluinnarnerup atorunnaarsitaanissaanut tunngatillugu aalajangiiniarnermi innuttaasut naammaginantumik peqataatinneqarsimanerat pillugu § 37 naapertorlugu apeqquteqaammut nr. 54/2013-imut Naalakkersuisut akissuteqaamminni akipput "Innuttaasunik soqutigisaqartunillu peqataatitsinissamut ingerlatassat arlallit Naalakkersuisut ingerlatissamaarpaat. Taakkua piffissap maannakkut naalakkersuisut atuuffiata ulloq 5. april 2013 aallartittup ingerlanerani ullut 100-it siulliit iluanni tamanut ammasumik saqqummiunneqassapput. Taamaalillutik Naalakkersuisut suliaasaqarfimmi tassani oqaasertalersuinermi innuttaasut peqataatinniarpaat."**
Attueqqusinngilluinnarneq pillugu politikkeqarnerup atorunnaarsinneqarnissaa pillugu politikkip oqaasertalersorneqarneranut innuttaasut Naalakkersuisut qanoq peqataatippaat, aalajangernissaq sioqqullugu?
- 2) **Naalakkersuisut erseqqissumik nalunaarutiginiuuat attueqqusinngilluinnarnermik atorunnaarsitsinissaq tunngaviusumik aalajangernerussasoq suliniutinut ataasiakkaanut tunngassuteqarani. Taamaamat Naalakkersuisut isumaqataappat tunngaviusumik aalajangerneq illoqarfiit imaluunniit nunap immikkoortuisa ataasiakkaat inuinit taamaallaat attuumassuteqarani nunap inuinit tamanut attuumassuteqarmat?**
- 3) **Qanga piffissap aprilip 5-iata oktoberillu 24-atalu akornanni innuttaasunik soqutigisaqartunillu peqataatitsinissamut ingerlatassatut arlalittut siumut kalleriutigineqartut Naalakkersuisut ingerlappaat, aammalu innuttaasunik soqutigisaqartunillu peqataatitsinissamut ingerlatani tamakkuna inuit paasisimasaqarluartut arlaannaannulluunniit attuumassuteqanngitsut Naalakkersuisut peqatigivaat?**
- 4) **§ 37 naapertorlugu apeqquteqaammut nr. 127/2013-imut akissuteqaamminni Naalakkersuisut allapput attueqqusinngilluinnarnerup atorunnaarsinneqarnissaa Inatsisartut akuersissutigissappassuk "Naalakkersuisut tamatumunnga ilutigitillugu inassutigissavaat Innuttaasunik qaammarsaanermik kiisalu eqeersimaartumik innuttaasunik**

peqataatitsinissaq annertunerusumik suliniuteqarnermik tamanna malitseqassasoq." Taamatut innuttaasunik qaammarsaaneq eqeersimaartumillu innuttaasunik peqataatitsinissaq qaqugu ingerlanneqassava?

- 5) Taamatut innuttaasunik qaammarsaanermut innuttaasunillu peqataatitsinermut atugassanik 2014-imut aningaasanut inatsimmi missingersuutinilu Naalakkersuisut qassinik immikkoortitsippat?
- 6) Paasissutissat nalunaarusiallu inunnit arlaannaannulluunniit attuumassuteqanngitsunit suliarineqartut aallaavigalugit taamatut innuttaasunik qaammarsaasoqarnissaa innuttaasunillu peqataatitsisoqarnissaa Naalakkersuisut qulakkeernialersaarpaat?
- 7) Nunatsinni pisortani ingerlatsinermi ammanerusumik ersarinnerusumillu sulinissaq pillugu § 37 naapertorlugu apeqquteqaammut nr. 36/2013-imut Naalakkersuisut akissuteqaamminni allapput "Naalakkersuisut pingaarnertut anguniagaraat innuttaasut peqataatinneqarnissaat taamatullu innuttaasut sunniuteqarsinnaanerata Naalakkersuisut sulineranni qitiutinneqarnissaata qulakkeerneqarnissaa. Taamaammanuna Naalakkersuisut pingaartillugu anguniagarigaat sapinngisamik annertunerpaamik Inatsisartut inatsisissaattut siunnersuutit tusarniaassutigineqartarnerannut naammattumik piffissaliisoqartalernissaa." Attueqqusinnigilluinnarnerup atorunnaarsitaanissaanut Naalakkersuisut siunnersuutaat qanoq siviutigisumik tusarniaassutigineqarpa?
- 8) Siunnersuutit, aamma inatsisissatut siunnersuutit iluseqaannanngitsut aammattaarli inuiaqatigiinnut kalaallinut tamanut pingaaruteqavissortut tungaviusumik aalajangiinissamut siunnersuutaasut, siunissami naammattumik piffissaligaasunik tusarniaasoqartoqartalernissaa Naalakkersuisut qulakkeerumavaat?

Tungavilersuut:

Ammasumik ersarissumillu naalakkersueriaaseqarnissaq Naalakkersuisut neriorsuutigiunnaarneq ajorpaat, aammalu nuna tamakkerlugu innuttaasunik peqataatitsinissaq pingaartitaralugu. Atortussiassat radioaktiviisut pillugit attueqqusinnigilluinnarnerup atorunnaarsitaanissaanut atatillugu neriorsuutit tamakku eqqortinneqarsimanerat takujuminaappoq, massa aalajangiisoqartinnagu politikkip tamatuma oqaasertalersornissaanut innuttaasunik peqataatitsinissaq Naalakkersuisut neriorsuutigeqattaartarsimagaluaaraat.

Apeqqutit akeqquneqarput ullut suliffiusut qulit qaangiutinnginnerini.

(Inatsisartunut ilaasortaq Sara Olsvig, Inuit Ataqatigiit)